

四庫全書

集部

欽定四庫全書

集部

御選歷代詩餘卷九十七

詳校官中書臣潘有為

侍讀臣孫球覆勘

總校官進士臣朱 鈐

校對官編修臣沈清藻

謄錄監生臣崔鶴立

欽定四庫全書

御選歷代詩餘卷九十七目錄

起一百十七字
至一百三十字

子夜歌

彭元遜

馮鼎位

鳳歸雲

又一體

柳永

雙鸞

吳肱

夏雲疊嶂

王錫爵

暮雲碧

李甲

金明池

秦觀

僧揮

送征衣

柳永

水漫聲

屠隆

瑤臺月

又一體

葛長庚

白苧

蔣捷

笛家

柳永

朱雍

多麗

傅按察

秋思耗

吳文英

洞仙歌

又一體

柳永

晁補之

翠羽吟

蔣捷

洞仙歌

又一體

晁補之

春風嫋娜

馮艾子

白苧 又體

柳永

引駕行 又體

柳永

洞仙歌 又體

柳永

蘭陵王

周邦彥

葛郊

辛棄疾

張元幹

二首

曹冠

袁去華

二首

高觀國

二首

史達祖

李昴英

方千里

楊澤民

陳允平

趙必璩

劉辰翁

施岳

彭履道

張翥

邵亭貞

御選歷代詩餘卷九十七目錄

欽定四庫全書

御選歷代詩餘卷九十七

起一百七字至一百三十字

司經局洗馬掌局事兼翰林院修撰加二級臣王堉清奉

旨校刊

子夜歌

雙調一百十七字此子夜歌正格與菩薩蠻之別名者不同也

子夜歌

和劉尚友韻

彭元遜

視春衫篋中半在浥浥酒痕花露恨桃李隨風吹盡夢

裏故人如霧臨穎美人秦川公子却共何人語對誰家
花草池臺回首故園咫尺未成歸去 昨宵聽危絃急
管酒醒不知何處漂泊情多衰遲感易無限堪憐許似
尊前眼底紅顏消幾寒暑年少風流未諳春事追與東
風賦待他年君老巴山共君聽雨

前調

馮鼎位

上西樓曲屏暮靄記得燭花紅處自心字香消綺袖飛
散彩雲難聚春水畫橋煙溪芳草夜夜相思路悵重來

情事依然惟有半簾淡月照人離緒
酒闌後無聊短夢尚逐紫簫聲去
楊柳梢頭寒梅影裏曾看弓彎舞想
章臺信杳淒涼京兆眉嫵啼帕遺紅唾
裙留碧憔悴鶯花主倩誰傳桃葉桃根
斷腸新句

鳳歸雲

又一體雙調
一百十八字

鳳歸雲

柳永

戀帝里金谷園林平康巷陌觸處繁華連日疎狂未嘗

輕負寸心雙眼況佳人盡天外行雲堂上飛燕向玳筵
一一皆妙選長是因酒沉迷被花縈絆更可惜淑景
亭臺暑天枕簟霜月夜涼雪霰朝飛一歲風光盡堪隨
分俊遊清宴算浮生事瞬息光陰鎔銖名宦正歡笑試
恁暫分散即是恨雨愁雲地遙天遠

雙鸞

雙調一百
十八字

雙鸞

明媛
吳朏

雨浴幽庭冰簟清涼足篆煙微宿醒乍醒枕痕消玉驚
聞咽徵諧商却是鐺烹泉熟傾瑤杯露芽清撲更萱花
黃嫩絳榴紅簇十二闌干間倚引却雙睂感 心事悠
悠惟有吟清竹晚風輕雲疎蟾漏重巒改目且開花下
金尊得趣偏宜幽獨捲湘簾清光滿屋有句穿溟漠花
飛酹綠報道紫簫人返共引雙鸞曲

夏雲疊嶂

雙調一百十八字王錫爵

一詞和友人自度曲也

夏雲疊嶂

王錫爵

盡把南牕洞啓覺荷香十里尚未全衰早近水人家三分暑散沿樓樹色一味寒來縱飛仙飛到也教重築避風臺真所謂清涼世界笑渠河朔未免塵懷 原是大
家風月豈山僧野老讓彼應該便冷落行囊剩書殘卷
尋常供具竹箸磁杯得終年居此世間樂事孰如哉但
不識塵魔許我幾多牽絆可肯離開

暮雲碧

雙調一百十九
字一名弔巖陵

暮雲碧

李甲

蕙蘭香泛孤嶼潮平驚鷗散雪迤邐點破澄江秋色暝
靄向斂疎雨乍收染出藍峰千尺漁舍孤煙鎖寒磧畫
鷁翠帆旋解輕棹晴霞岸側正念往悲酸懷鄉慘切何
處引羌笛追惜當時富春佳地嚴光釣址空遺迹華
星沉後扁舟泛去瀟灑閒名圖籍離觴弔終寓目意閑
魂消淚滴漸洞天曉回首暮雲千里碧

金明池

宋汴京遊幸地也南宋德壽出遊修舊京金明池故事調名取此雙調一百二十字有以夏雲峰別為一調者按與此畧無分別蓋即此調別名也

金明池

秦觀

瓊苑金池青門紫陌似雪楊花滿路雲日澹天低晝永
過三點兩點細雨好花枝半出牆頭似悵望芳草王孫
何處更水遶人家橋當門巷燕燕鶯鶯飛舞怎得東
君常為主把綠鬚朱顏一時留住佳人唱金衣莫惜才
子倒玉山休訴況春來倍覺傷心念故國情多新年愁

苦縱寶馬嘶風紅塵拂面也只尋芳歸去

前調

僧揮

天闊雲高溪橫水遶曉日寒生輕暈閒階靜楊花漸少
朱門掩鶯聲欲嫩悔匆匆過却清明旋占得餘芳已成
幽恨却幾日陰沉連宵慵困起來韶華都盡怨入雙
睂閒鬪損怎拾得情懷看承全近深深態無非自許厭
厭意終羞人問爭知道夢裏蓬萊待忘了餘香時傳音
信縱留得鶯花東風不住也到眼前愁悶

送征衣

雙調一百二十字

結句作五字者非

送征衣

柳永

過昭陽璿樞電繞華渚虹流運應千載會昌聲震宇薦
殊祥吾皇誕彌月瑤圖纘慶玉葉騰芳竝景貺三靈眷
祐挺英哲掩前王遇年年嘉節清和頒率土稱觴無
間要荒華夏盡萬里走梯航彤庭舜張大樂禹會羣方
鴈行趨上國山呼罄抃遥爇爐香竟就日瞻雲獻壽指

南山等無疆願巍巍寶歷鴻基天地齊長

水漫聲

雙調一百二十字止屠隆
作一首或是隆自度腔也

水漫聲

西湖

屠隆

一片大湖何限浸空城碧浪崔巍白日孤懸畫屏四合
翠微裏湧出樓臺落盡桐花飄殘柳絮正芙蕖冉冉將
開衣上冷香飛欲濕輕鷗如帶蘭漿共潏洄天放閒
人時容傲吏水雲深處相對且銜杯君莫對此景浪生

憂喜請看層波疊疊前後相催錢氏舞裊趙家歌扇零
落總成灰君去也西湖無恙歌舞又重來

瑤臺月

又一體雙調
一百二十字

瑤臺月

葛長庚

煙霄凝碧問紫府清都今夕何夕桐陰下幽情遠與秋
無極念陳迹虎殿虬宮記往事龍簫鳳笛露華冷蟾光
白雲影靜天籟息知得是蓬萊不遠身無羽翼 廣寒

宮舞徹霓裳白玉臺歌罷瑤席爭不思下界有人岑寂
羨博望兩泛仙槎與曼倩三偷桃實把丹鼎暗融液乘
雲氣醉麾斥嗟惜但城南老樹人誰我識

白苧

苧或作紵亦名白紵歌晉宋以來舞曲俱
有白紵辭調名取此雙調一百二十一字

白苧

蔣捷

正春晴又春冷雲低欲落瓊苞未剖早是東風作惡旋
安排一雙銀蒜鎖羅幙幽壑水生漪皺嫩綠潛鱗初躍

惜惜門巷桃樹紅纔約略知甚時霽華烘破青青萼
憶昨引蝶花邊近來重見身學垂楊瘦削問小翠睂山
為誰攢却斜陽院宇任蛛絲罥徧玉箏絃索戶外惟聞
放翦刀聲深在妝閣料想裁縫白苧春衫薄

笛家

雙調一百二十一

字或作笛家弄

笛家

柳永

花發西園草薰南陌韶光明媚乍晴輕煖清明後水嬉

舟動襖飲筵開銀塘似染金堤如繡是處王孫幾多遊
妓往往攜纖手遣離人對嘉景觸目盡成感舊別久
汴城當日蘭堂夜燭百萬呼盧畫閣春風十千沽酒未
省宴處能忘絃管醉裏不尋花柳豈知秦樓玉簫聲斷
前事難重偶空遺恨望仙鄉一晌淚沾襟袖

前調

詠梅次柳
屯田韻

朱雍

瓊質仙姿縞袂清格天然疎秀靜軒煙鎖黃昏後影瘦
零亂豔冷瓏璫雪肌瑩暖冰枝縈繡更賦風流幾番攀

贈細撚香盈手與東君敘睽遠脈脈時情有舊立久
闌苑凝夕瑤牕澹月百琲尋芳醉玉談羣千鍾酌酒向
此是處難忘瘦花送遠何勞垂柳忍聽高樓笛聲淒斷
樂事人非偶空餘恨惹幽香不滅尚沾春袖

多麗

雙調一百二十一字亦名鴨頭綠按多麗唐張均妓名而鴨頭綠唐教坊曲名也向分二調今合之宋人作多一百三十九字傳詞或有脫誤

多麗

失名傅按察

靜中看記昔日淮山隱隱宛若虎踞龍盤下樊裏指揮

湘漢鞭雲騎圍遶江干勢不成三時當混一過唐之數
不為難陳橋驛孤兒寡婦久假當還挂征帆龍舟催
發紫宸初卷朝班禁庭空土花暈碧輦路悄呵喝聲乾
縱餘得西湖風景花柳亦凋殘去國三千遊仙一夢依
然天澹夕陽間昨宵也一輪明月還照臨安

秋思耗

一名畫屏秋色雙

調一百二十三字

秋思耗

為括蒼名姝
賦聽雨小閣

吳文英

堆枕香鬟側。驟夜聲偏稱。畫屏秋色風碎。弗珠潤。侵歌
板。愁壓眉窄。動羅簾。清商寸心低訴。敘怨抑。映夢牕零
亂。碧待漲。綠春深。落花香汎。料有斷紅流處。暗題相憶
歡。夕簷花細滴。送故人粉黛重飾。漏侵瓊瑟。丁東敲
斷。弄情月白。怕一曲霓裳未終。催去驂。鳳翼。歎謝客猶
未識。漫瘦却東陽。燈前無夢到得。路隔重雲鴈北。

洞仙歌

又一體雙調一

百二十三字

洞仙歌

柳永

乘興閒泛蘭舟渺渺煙波東去淑氣散幽香滿蕙蘭江
渚綠蕪平畹和風輕暖曲岸垂楊隱隱隔桃花塢芳草
外閃閃酒旗遙舉羈旅漸入三吳風景水邨漁浦閒
思更遠神京拋擲幽會小歡何處不堪獨倚危樓凝情
西望日邊繁華地歸程阻空自歎當時言約無據傷心
最苦竚立對碧雲將暮關河遠怎奈向此時情緒

前調

填盧仝詩

晁補之

當時我醉美人顏色如花堪悅今日美人去恨天涯離
別青樓珠箔嬋娟蟾桂三五初圓傷二八還又缺空佇
立一望不見心絕心絕頓成淒涼千里音塵一夢歡
娛推枕驚巫山遠灑淚對湘江闊美人不見愁人看花
心亂含愁奏綠綺絃清切何處有知音此恨難說怨歌
未闕恐暮雨收行雲歇梅發乍似覩芳容冰潔

翠羽吟

雙調一百

二十四字

翠羽吟

蔣捷

紺露濃映素空樓觀悄玲瓏粉凍霽英冷光搖蕩古青
松半規黃昏澹月梅氣山影溟濛有麗人步依脩竹瀟
然態若游龍 綃袂微皺水溶溶仙莖清濯淨洗斜紅
勸我浮香桂酒環珮暗解聲飛芳靄中弄春弱柳垂絲
慢按翠舞嬌童醉不知何處驚翦翦淒緊霜風夢醒尋
痕訪蹤但留殘挂穹梅花未老翠羽雙吟一片曉峰

洞仙歌

又一體雙調一

百二十四字

洞仙歌

留春

晁補之

花恨月惱更夏有涼風冬軒雪皎閒事不關心算四時
皆好從來又說春臺登覽人意多同常是惜春過了須
痛飲莫放歡情草草年少尚憶瑤階得雋尋芳驂驪
東坡適見垂鞭酕醺南陌又逢低帽鶯花蕩眼功名滿
意無限嬉遊榮華事如夢杳傷富貴浮雲曾縈懷抱為
春醉倒願花更好春休老開口笑占醉鄉莫教人到

春風嫋娜

此馮艾子自度腔雙
調一百二十五字

春風嫋娜

馮艾子

被梁間雙燕話盡春愁朝粉謝午花柔倚紅闌故與蝶
圍蜂遶柳絲無數飛上搔頭鳳管聲圓蠶房香煖笑挽
羅衫須少留隔院蘭馨趁風遠鄰牆桃影伴煙收些
子風情未減睂頭眼尾萬千事欲說還休薔薇露牡丹
毬殷勤記省前度綢繆夢裏飛紅覺來無覓望中新綠

別後空稠相思難偶歎無情明月今年已是三度如鉤

白苧

又一體雙調一
百二十五字

白苧

雪

柳永

繡簾垂畫堂悄寒風淅瀝遙天萬里黯淡同雲幕歷漸
紛紛六花零亂散空碧姑射宴瑤池把碎玉零珠拋擲
林巒望中高下瓊瑤一色嚴子陵釣臺歸路迷蹤跡

追惜燕然畫角寶箏珊瑚是時丞相虛作銀城換得當

此際偏宜訪袁安宅醺醺醉了任金釵舞困玉壺傾側
又是東君暗遣花神先報南國昨夜江梅漏泄春消息
引駕行

又一體雙調一
百二十五字

引駕行

柳永

紅塵紫陌斜陽暮草長安道是誰人斷魂處迢迢匹馬
西征新晴韶光明媚輕煙澹薄和氣暖望花邨路隱映
搖鞭時過長亭愁生傷鳳城仙子別來千里重行行又

記得臨岐淚眼濕蓮臉盈盈銷凝
花朝月夕最苦冷
落銀屏想媚容耿耿無限屈指已算回程相縈空萬般
思憶爭如歸去覩傾城向繡幃深處仔細說如此牽情

洞仙歌

又一體雙調一
百二十六字

洞仙歌

柳永

佳景留心慣況年少彼此風情非淺有笙歌巷陌綺羅
庭院傾城巧笑如花面恣雅態明眸回美盼同心綰算

國豔仙材翻恨相逢晚
繾綣洞房悄悄繡被重重夜
永歡餘共有海約山盟記得翠雲偷翦和鳴彩鳳于飛
燕向柳徑花陰攜手徧情眷戀問其間密約輕憐事何
限忍聚散况已結深深願願人間天上暮雲朝雨長相
見

蘭陵王

三疊一百三十字蘭陵王者北齊高長公封號取以名詞
以其遇敵先登周齊之間多用為樂府曲也亦名高冠軍

蘭陵王

周邦彥

柳陰直煙縷絲絲弄碧隋隄上曾見幾番拂水飄絲送
行色登臨望故國誰識京華倦客長亭路年去歲來應
折柔條過千尺閒尋舊蹤跡又酒趁哀絃燈照離席
梨花榆火催寒食愁一箭風快半篙波暖回頭迢遞便
數驛望人在天北悽惻恨堆積漸別浦縈迴津堠岑
寂斜陽冉冉春無極念月榭攜手露橋聞笛沉思前事
似夢裏淚暗滴

前調

和吳
宣卿

葛

郊

亂煙簇簾外青山漸肅蓮房淨荷蓋半殘欲放清連媚
溪綠憑高送遠目飛起滄洲鴈驚寒牕靜茶椀未深一
枕方牀晝眠足閒行問松菊怪今雨誰家空對銀燭
簫聲忽下瑤臺曲看鶴舞風動烏啼雲起何須舟內怨
女哭抱琴寫幽獨情觸會相續况節近中元月浪翻
屋長鯨愁曉寒蟬促要百柁傾珠萬花流玉山有倒盡
又空腹膾野藪

前調

賦一丘
一壑

辛棄疾

一丘壑老子風流占却茅簷上松月桂雲脈脈石泉逗
山脚尋思前事錯惱殺晨猿夜鶴終須是鄧禹輩人錦
繡麻霞坐黃閣長歌自深酌看天闊鳶飛淵靜魚躍
西風黃菊香噴薄悵日暮雲合佳人何處紉蘭結佩帶
杜若入江海會約遇合事難托莫擊磬門前荷蕢人
過仰天大笑冠簪落待說與窮達不須疑著古來賢者
進亦樂退亦樂

前調

張元幹

卷珠箔朝雨輕陰乍閣闌干外煙柳弄晴芳草侵堦映
紅藥東風妒花惡吹落梢頭嫩萼屏山掩沉水倦熏中
酒心情怕杯勺尋思舊京洛正年少疎狂歌笑迷著
障泥油壁催梳掠魯馳道同載上林攜手燈夜初過早
共約又爭信漂泊寂寞念行樂甚粉澹衣襟音斷絃
索瓊枝壁月春如昨悵別後華表那回雙鶴相思除是
向醉裏輒忘却

前調

張元幹

綺霞散空碧留晴向晚東風裏天氣困人時節秋千閑
深院簾旌翠波颭影殘紅一線春光巧花臉柳腰勾
引芳菲鬧鶯燕閒愁費消遣想蛾綠輕暈鶯鑑新怨
單衣欲試寒猶淺羞衾鳳空展塞鴻難托誰問潛寬舊
帶眼念人似天遠迷戀畫堂宴看最樂王孫濃豔爭
勸蘭膏寶篆春宵短擁檀板低唱玉杯重煖衆中先醉
漫倚檻早夢見

前調

曹冠

晚雲碧松巘飛泉翠滴雙溪畔疑是永和曲水流觴舊
風物波光映山色時見輕鷗出沒壺天邃脩竹翠陰虛
籟吟風更幽寂登臨興何極上煙際危亭綵筆題石
山中猿鶴應相識對遠景舒嘯壯懷豪逸劉郎何在翫
石刻感往事陳迹還憶少年日帥旗鼓文場軒冕京
國如今老大機心息有陶令秫酒謝公山屐閒來潭洞
醉皓月弄橫笛

前調

柳州作

袁去華

曉陰薄隔屋呼晴噪鵲長煙裊輕素望中林表初陽照
城郭秋容自寂寞清淺溪痕漸落橋虹外晴嶂萬重雲
木千章映樓閣天涯信飄泊漫水遶郴山尺素難托
文園多病寬衣索最長笛聲斷畫欄凭煖黃昏前後况
味惡甚良宵閒却遼邈誤行樂料恨寄徽絃心倦梳
掠西風滿院垂簾幕對千里明月五更悲角歸期秋盡
尚未定怎睡著

前調

次周美成韻

袁去華

小橋直林表遙岑寸碧斜陽外霞絢晚空一目千里總
佳色初寒徧澤國投老依然是客功名事雲散鳥飛匣
裏青萍漫三尺重來愴陳迹又水褪沙痕風滿帆席
鱸肥蓴美曾同食聽虛閣松韻古牆竹影參差猶記過
此驛傍溪南山北悲惻暗愁積擁繡被焚香誰伴孤
寂追尋恩怨無窮極正難續幽夢厭聞鄰笛那堪簷外
更夜雨斷又滴

前調

春雨

高觀國

灑塵閣幕幕天垂似幕春寒峭吹斷萬絲濕影和煙暗
簾箔清愁曉來覺佳景惜惜過却芳郊外鶯恨燕愁不
管秋千冷紅索行雲楚臺約念今古凝情朝暮如昨
啼紅泣翠春情薄漫一犁江上半篙堤外勾引輕陰趁
畫角正孤緒寂寞斑駁止還作聽點點簷聲沉沉春
酌只愁入夜東風惡怕催教花放趲將花落溟濛煙草
夢正遠恨怎託

前調

為十年
故人作

高觀國

鳳簫咽花底寒輕夜月蘭堂靜香霧翠深曾與瑤姬恨
輕別羅巾淚暗疊情入歌聲怨切慙慙意欲去又留柳
色和秋為重折十年迴淒絕念髻怯瑤簪衣褪香雪
雙鱗不度煙江濶自春來人見水邊花外羞倚東風翠
袖怯正愁恨時節南陌阻金勒甚望斷青禽難倩紅
葉春愁欲解丁香結整新歡羅帶舊香官篋淒涼風景
待見了更何說

前調

南湖以碧蓮見
寄次韻謝之

史達祖

漢江側月弄仙人佩色含情久搖曳楚衣天水空濛染
嬌碧文漪簟影織涼骨時將粉飾誰曾見羅幃去時點
點波間冷雲積相思舊飛鷗漫想像風裳追恨瑤席
涉江幾度和愁摘記雪映雙腕刺縈絲縷分開綠蓋素
袂濕放新句吹入寂寂意猶昔念淨社因緣天許相
覓飄蕭羽扇搖團白屨側臥尋夢倚闌無力風標公子
欲下處似認得

前調

李昉英

燕穿幕春在深深院落單衣試龍沫旋熏又怕東風曉
寒薄別來情緒惡瘦得腰圍柳弱清明近正似海棠怯
雨芳蹤任飄泊 釵留去年約恨易老嬌鶯多誤靈鵲
碧雲杳渺天涯各望不斷芳草又迷香絮回文強寫字
屢錯淚欲注還閣 孤酌佳春脚更彩局誰快寶軫慵
學堦除拾取飛花嚼是多少春恨等閒吞却猛拍闌干
歎命薄悔舊諾

前調

次周美成韻

方千里

晚煙直池沼波痕皺碧年芳為花態柳情按粉揉藍釀
春色繁華記上國曾識傾城妙客風流事聯句送鈎牋
綠綃紅遞書尺行雲去無迹念暖響歌臺香霧瑤席
當時誰信盟言食知一歲離聚幾多間阻人生如夢寄
堠驛况分散南北悲惻萬愁積奈鸞鳳歡疎魚鴈音
寂天涯何處相思極但目斷芳草恨隨塞笛那堪庭院
更聽得夜雨滴

前調

漁父詞次
周美成韻

楊澤民

翠竿直一葉扁舟漾碧澄江上幾度嘯日迎風怡怡釣
秋色漁鄉共水國都屬滄浪傲客煙波外風笠雨蓑纔
擲絲綸便千尺飄然去無迹恣脚扣雙舷帆挂輕席
盈鉤香餌魚爭食更撥棹葭岍放篙菱浦纔過新柵又
舊驛占江南江北堪惻利名積算縱有豪華難比清
寂須知此樂天無極有一斗芳酒數聲橫笛蘆花深夜
半醉裏任露滴

前調

次周美成韻

陳允平

古堤直隔水輕盈颺碧東風路還是舞煙眠露年年自
春色紅塵徧京國留滯高陽醉客斜陽外千縷翠條髣
髴流鶯度金尺長亭半陳迹記曾繫征鞍頻護歌席
匆匆江上又寒食回首處應念舊曾攀折依然離恨徧
四驛倦遊尚南北惻惻怨懷積漸楚榭寒收隋苑春
寂顰眉不盡相思極想人在何處倚樓橫笛閒情似絮
更那聽夜雨滴

前調

韻上用
美成韻

趙必瑑

畫欄直闌釘千紅萬碧無端被怪雨狂風慙柳僝花禁
春色尋芳徧楚國誰識五陵俊客流水遠題葉無情鴈
足不來杳牋尺浮生等萍迹纔卸却歸鞭坐未溫席
匆匆還又京華食歎聚少離多漂零因甚江南逢梅望
寄驛美人兮天北悲惻恨成積悵釵玉塵生貌金煙
寂綠楊芳草情何極偏嬾撥琵琶愁聽羌笛梨花院落
黃昏後珠淚滴

前調

送春

劉辰翁

送春去春去人間無路秋千外芳草連天誰遣風沙暗
南浦依依甚意緒漫憶海門飛絮亂鴉過斗轉城荒不
見來時試燈處春去最誰苦但箭鴈沉邊梁燕無主
杜鵑聲裏長門暮想玉樹凋霜淚盤如露咸陽送客屢
回顧斜日未能渡春去尚來否正江令恨別庾信愁
賦蘇堤盡日風和雨歎遊神故國花記前度人生流落
顧孺子共夜語

前調

施岳

柳花白飛入青煙巷陌憑高處愁鎖斷橋十里東風正
無力西湖路咫尺猶阻仙源信息傷心事還似去年中
酒懨懨度寒食 閒牕掩春寂但粉指留紅茸唾凝碧
歌塵不散蒙香澤念鸞孤金鏡鴈空瑤瑟芳時良夜盡
怨憶夢魂省難覓 鱗翼渺蹤跡縱羅幃親題錦字誰
識緘情欲寄重城隔又流水斜照倦簫殘笛樓臺相望
對暮色恨無極

前調

彭履道

章臺路西出重城幾步秦樓曉花氣分明一霎空濛洗
高樹行人半倚戶飛去黃鸝自語秋千小不繫柳條惟
有輕陰約飛絮 鈿車暗相遇早拂拭紅巾初放鸚鵡
聞歌猶是淋鈴處喚鳴箏掩面倚壚呼酒東風重記舊
嬌嬈報伊共歌舞 西去屢回顧漸客舍荒涼嘶馬先
駐玉關萬里知何許但倦擁荒澤瓜洲難渡將軍垂老
望故國夜夢苦

前調

臨川寓
舍聞箏

張翥

晚風惡牆外楊花正落秋千罷人在瑣窗猶怯春寒下
簾幙多情倦繡作恰了棠梨半夢移金鴈應是自調盡
寄深情與絃索數聲白翎雀又歇指多時嬌甚彈錯
新聲舊譜都忘却想紅香憔悴錦書遼遼匆匆前度見
約畧甚如在天角霧閣閉銀鑰奈夢斷行雲青鳥難
托三生書記情緣薄記舊家歌舞那時行樂桃枝人面
問酒家負舊約

前調

邵亨貞

暮天碧長是登臨望極松江上雲冷鴈稀立盡斜陽耿
相憶凭欄起歎息人隔吳王故國年華晚煙水正深難
折梅花寄寒驛東風舊遊歷記草暗書簾苔滿吟屐
無情征旆催離席嗟月墮寒影夜移清漏依稀曾向夢
裏識恍疑見顏色空惜鬢毛白恨莫趁金鞍猶誤塵
跡何時弭棹蘓臺側共漉酒紗帽放歌瑤瑟春來雙燕
定否到舊巷陌

卽選歷代詩餘卷九十七

欽定四庫全書

御選歷代詩餘卷九十八目錄

起一百三十二字至一百三十八字

瑞龍吟

翁元龍

劉基

破陣樂

又一體

張先

柳永

大酺

周邦彥

趙以夫

方千里

楊澤民

吳文英

陳允平

周密

劉辰翁

顏奎

浪淘沙慢

又一體

周邦彥

瑞龍吟

又一體

周邦彥

方千里

楊澤民

吳文英 二首

陳允平

張翥

前調 又一體

楊慎

浪淘沙慢 又一體

周邦彥

方千里

楊澤民

吳文英

陳允平

西平樂

又一體

吳文英

歌頭

後唐莊宗

西平樂

又一體

周邦彥

方千里

陳允平

多麗

又一體

李漳

御選歷代詩餘卷九十八目錄

欽定四庫全書

御選歷代詩餘卷九十八

起一百三十二字
至一百三十八字

司經局洗馬掌局事兼翰林院修撰加二級臣王奕清奉

旨校刊

瑞龍吟

三疊一百三十二字前二段
屬正平調所謂雙拽頭也

瑞龍吟

翁元龍

清明近還是遞趙東風做成花信芳時一刻千金半晴

半雨酹春未準 鴈橫陣數字向人慵寫暗雲難認西
園猛憶逢迎翠紈障面花間笑隱 曲徑池連平砌絳
裙曾與濯香湔粉無奈燕幕鶯簾輕負嬌俊春榆巷陌
馬蹋紅成寸十年夢秋千弔影韞羅塵褪事往憑誰問
晝長病酒添新恨煙冷斜陽暝山黛遠曲曲闌干凭損
柳絲萬尺半堤風緊

前調

劉基

秋光好無奈錦帳香消繡幃寒早鈎簾人立西風送書

過鴈依然又到 故鄉杳空把淚隨江水夢縈西草何
時賦得歸來倚松對柳開尊醉倒 衰鬢不堪臨鏡鏡
中愁見蓬飛絲繞門外遠山青青長帶斜照石泉澗月
孤負夜猿嘯傷心處楓凋露渚荷枯烟沼燕去黃蜂老
蒲天細雨鳴羈鳥花蔓當檐裊庭院靜遙聞清砧聲擣
擁衾背壁一燈紅小

破陣樂

又一體雙調一
百三十三字

破陣樂

張先

四堂互映雙門並麗龍閣開府郡美東南第一望故苑
樓臺霏霧垂柳池塘流泉巷陌吳歌處處近黃昏漸更
宜良夜簇繁星燈燭長衢如畫暝色韶光幾簾粉面飛
夢朱戶歡遇鴈齒橋紅裙腰草綠雲際寺林下路酒
熟梨花賓客醉但覺蒲山簫鼓盡朋遊因民樂芳菲有
主自此歸從泥詔去指沙堤南屏水石西湖風月好作
千騎行春畫圖寫取

前調

柳永

露花倒影烟蕪蘼碧靈沼波暖金柳搖風木末繁彩舫
龍船遙岸千步虹橋參差鴈齒直趨水殿遶金堤曼衍
魚龍戲簇嬌春羅綺喧天絲管霽色榮光望中似覩蓬
萊清淺時光鳳輦宸遊鸞觴禊飲臨翠水開鎬宴兩
兩輕舠飛盡檝競奪錦標霞爛聲歡娛歌魚藻徘徊宛
轉別有盈盈遊洛女採明珠爭收翠羽相將歸去漸覺
雲海沉沉洞天日晚

大酺

漢唐皆有賜酺合宴歡樂也唐教坊有大酺詞取以名雙調一百三十三字

大酺

周邦彥

對宿烟收春禽靜飛雨時鳴高屋墻頭青玉旆洗鉛霜
都盡嫩梢相觸潤逼琴絲寒侵枕障蟲網吹黏簾竹郵
亭無人處聽檐聲不斷困眠初熟奈愁極頻驚夢輕難
託自憐幽獨行人歸意速最先念流潦妨車轍怎奈
向蘭成顚顚衛玠清羸等閒時易傷心目未怪平陽客

雙淚落笛中哀曲況蕭索青蕪國紅糝鋪地門外荆桃
如菽夜遊共誰秉燭

前調

賞壯丹

趙以夫

正綠陰濃鶯聲嫩庭院寒輕烟薄天然花富貴逞妖紅
殷紫疊葩重萼醉艷酣春妍姿浥露翠羽輕明如削檀
心鴉黃嫩似離情愁緒萬絲交錯更銀燭相輝玉瓶微
浸宛然京洛朝來風雨惡怕僂僂低張青油幕便好
倩佳人插帽上客傳牋趁良辰賞心行樂四美難并也

須攬醉莫辭杯杓被花惱情無著長笛何處一笑江頭
高閣極目水雲漠漠

前調

次周美成韻

方千里

正夕陽閒秋光澹鴛瓦參差華屋高低簾幙迥但風搖
環珮細聲頻觸瘦怯單衣涼生兩袖零亂庭梧牕竹相
思誰能會是歸程客夢路諳心熟況時節黃昏閒門人
靜凭闌身獨歡情何太速歲華似飛馬馳輕轂漫自
歎河陽青鬢冉冉如霜把菱花悵然凝目老去踈狂減

思墮策小坊幽曲趁遊樂繁華國回首無緒清淚紛於
紅菽話愁更堪翦燭

前調

次周美成韻

楊澤民

漸雨回春風清夏垂柳涼生芳屋餘花猶滿地引蜂遊
蝶戲慢飛輕觸院宇深沉簾櫳寂靜蒼玉時敲疎竹雕
梁新來燕恣呢喃不住似曾相熟但雙去并來漫縈幽
恨枕單衾獨仙郎去又速料今在何許佇雙轂任夢
想頻登臺榭偏倚闌干水雲千里空流目縱遇雙魚客

難盡寫別來心曲媚容幸傾城國今日何事還又難分
麝菽寸心天上可燭

前調

荷塘小隱

吳文英

峭石帆收歸期差林沼半銷紅碧漁蓑樵笠畔買佳鄰
翻葢浣花新宅地鑿桃陰天開藻鏡聊與漁郎分席滄
波畊不碎似藍田初種翠烟生壁料情屬新逢夢驚春
草斷橋相識平生江海客秀懷抱雲錦當秋織任歲
晚陶離菊暗逋梅荒總輸玉井嘗甘液忍棄紅香葉

集楚裳西風催著正明月秋無極歸隱何處門外垂楊
天窄放船五湖夜色

前調

次周美成韻

陳允平

霧幕西山珠簾捲濃靄淒迷華屋蒲萄新綠漲正桃花
烟浪飛紅翻觸繡閣留寒羅衣怯潤慵理鳳樓絲竹東
風垂楊恨鎖朱門深靜粉香初熟念緩酌燈前醉吟孤
枕頻成清獨傷心春去速歎雙景虛擲如飛轂漫辜
負秋千臺榭拾翠心期誤芳菲怨眉愁目冷透金篝濕

空展轉畫屏山曲夢不到華胥國閒倚雕楹試採青青
梅菽海棠尚堪對燭

前調

周密

又子規啼荼蘼謝寂寂春陰池閣羅牕人病酒奈牡丹
初放晚風還惡燕燕歸遲鶯鶯聲嬾閒罨秋千紅索三
分春過半早朱桁塵凝翠衣香薄傍鴛逕鸚籠一池萍
碎半檐花落 冉冉春夢弱楚臺遠負雨期雲約漫念
想清歌錦瑟翠管瑤尊幾回重醉東園酌但免葵燕麥

倩誰訪畫闌紅藥况多病腰如削相如老去賦筆吟簪
閒却此情更誰問著

前調 春寒

劉辰翁

任瑣牕深重簾閉春寒知有人處當年笑花信問東風
情性是嬌是妒冰柳成鬚吹桃欲削知更海棠堪否相
將燕歸後看香泥半雪欲歸還誤漫低回芳草依稀寒
食朱門封絮少年慣羈旅亂山斷歌樹喚船渡正暗
思雞聲落月梅影孤屏更夢衾千里似霧相如倦遊去

掩四壁淒其春暮休回首都門路幾番行曉箇箇阿嬌
深貯而今斷烟細雨

前調

和須溪
春寒

顏奎

唱古荼蘼新荷葉誰向重簾深處東風三十六向園林
都過餘寒猶妒公子狐裘佳人翠袖怎見此時情否天
上知音杳怪參差律呂世間多誤記畫扇題詩單衣試
酒夢歸泥絮嗟春如逆旅送前路遠涉公無渡回首
住凌波亭館待月樓臺滿身花氣凝香霧度入南薰去

留燕伴不教遲暮但一點芳心苦生怕搖落分付荷房
收貯晚妝又隨過雨

浪淘沙慢

又一體雙調一
百三十三字

浪淘沙慢

周邦彥

萬葉戰秋聲露路結鴈度沙磧細草和烟尚綠遙山向晚
更碧見隱隱雲邊新月白映落照簾幙千家聽數聲何
處倚樓笛裝點盡秋色脉脉旅情暗自消釋念珠玉

臨水猶悲感何況天涯客憶少年歌酒當時蹤跡歲華
易老衣帶寬懊惱心腸終窄飛散後風流人阻藍橋約
悵恨路隔馬啼過猶嘶舊巷陌歎往事一一堪傷曠望
極凝思又把闌干拍

瑞龍吟

又一體一百三十三字一名章臺路按此調或分
三疊或分四段周邦彥詞於歸來舊處為第一段
盈盈笑語為第二段此即雙拽頭也若於低金縷
為第三段合末段為第四段則為四疊體各本互
異今從
三疊

瑞龍吟

周邦彥

章臺路還見褪粉梅梢試華桃樹惓惓坊陌人家定巢
燕子歸來舊處黯凝佇因記箇人癡小乍窺門戶侵
晨淺約宮黃障風映袖盈盈笑語前度劉郎重到訪
鄰尋里同時歌舞惟有舊家秋娘聲價如故吟箋賦筆
猶記燕臺句知誰伴名園露飲東城閒步事與孤鴻去
探春盡是傷離意緒官柳低金縷歸騎晚纖纖池塘飛
雨斷腸院落一簾風絮

前調

次周美成韻

方千里

樓前路愁見萬點風花數行烟樹依依斜日紅收暮山
翠接平蕪盡處小留佇還是畫闌凭暖半扃朱戶簾
櫳盡日無人消凝悵望時時自語堪恨行雲難繫賦
情楊柳徘徊猶舞追想向來歡娛懷抱非故題紅寄綠
魂斷江南句何時見輕衫霧唾芳茵蓮步燕子西飛去
為人試道相思悶緒空有腸千縷清淚滿斑斑多於春
雨忍看鬢髮密堆飛絮

前調

次周美成韻

楊澤民

城南路凝望映竹搖風酒旗標樹郊原遊子停車問山
崦裏人家甚處去還佇徐見畫橋流水小窓低戶深
沉綠蒲垂楊芳蔭姪姤嬌鶯解語多謝佳人情厚捲
簾羞得庭花飄舞可謂望風知心傾蓋如故猶帶香玉
休賦斷腸句堪憐處生塵羅襪凌波微步底事匆匆去
為他繫絆離情萬緒空有愁如縷桃李憶春風梧桐秋
雨又還過却落花飄絮

前調

送梅津

吳文英

黯分袖腸斷去水流萍住船繫柳吳宮嬌月嬈花醉題
恨倚蠻江豈蕊吐春繡筆底麗情多少眼波眉岫新
園鎖却愁陰露黃迷漫寒香半畝還背垂虹秋去四
橋烟雨一宵歌酒猶憶翠微攜壺烏帽風驟西湖到日
重見梅鈿皺誰家聽琵琶未了朝驄嘶漏印刻黃金籀
待來共凭齊雲話舊莫唱朱櫻口生怕遣樓前行雲知
後唳鴻怨角空教人瘦

前調

清明
競渡

吳文英

大溪面遙望繡羽衝烟錦梭飛練桃花三十六陂鮫宮
睡起嬌雷乍轉去如箭催趁戲旗遊鼓素瀾雪濺東
風冷濕蛟腥澹陰送晝輕霏弄晚洲上青蘋生處鬪
春不管懷沙人遠殘日半開一川花影零亂山屏醉纈
連棹東西岫闌干倒千紅妝靨鉛香不斷傍暝踈簾捲
翠漣皺淨笙歌未散簷柳嬌桃嫩猶自有玉龍黃昏吹
怨重雲暗閣春霖一片

前調

次周美成韻

陳允平

長安路還是燕乳鶯嬌度簾遷樹層樓十二闌干繡簾
半捲相思處處漫凭佇因念綵雲初到瑣牕瓊戶梨
花猶怯春寒翠羞粉怨尊前解語空有章臺烟柳瘦
纖仍似宮腰飛舞憔悴暗覺文園鬢非故閒拈斷葉
重托殷勤句頻回首河橋素約津亭歸步恨逐芳塵去
眩醉眼盡游絲亂緒腸結愁千縷深院靜東風落紅如
雨畫屏夢遠一篝香絮

前調

次周美成韻

張翥

黿溪路瀟灑翠壁丹崖古藤高樹林間猿鳥欣然故人
隱在溪山勝處久延佇渾似種桃源裏白雲牕戶燈
前素瑟清尊開懷正好連牀夜語應是山靈留客雪
飛風起長松掀舞誰是倦途相逢傾蓋如故陽春一曲
總是關心句何妨共磯頭把釣梅邊徐步只恐匆匆去
故園夢裏長牽別緒寂寞間針縷還念我飄零江湖烟
雨斷腸歲晚客衣誰絮

前調

又一體

楊慎

東風峭誰倩水翦餘霞日烘殘照妝成窺宋東牆傾城
傾國嫣然一笑輕籠罩葉底烟開冉冉枝頭春鬧燕
泥香裏斜陽酒旗映水天涯一棹消息繁華誰報記
曲江池上長安古道多少愁落愁開風橫雨暴沉吟無
語時把朱闌靠知誰伴單衫露冷碎紅簪帽倚醉狂歌
浩悠悠盡是傷離調花艷為誰好春又晚可惜年華空
老關山迢遞故人難到

浪淘沙慢

又一體三疊一百三十三字

浪淘沙慢

周邦彥

曉陰重霜凋嶺草霧隱城堞南陌脂車待發東門帳飲
乍闌正拂面垂楊堪攬結掩紅淚玉手親折念漢浦離
鴻去何許經時音信絕情切望中地遠天濶向露冷
風清無人處耿耿寒漏咽嗟萬事難忘惟是輕別翠尊
未竭憑斷雲留取西樓殘月羅帶光銷紋衾疊連環

斷舊香頻歇，怨歌永瓊壺，敲盡缺恨。春去不與人期，弄
夜色空餘，滿地梨花雪。

前調

次周美
成韻

方千里

素秋霽雲橫，曠野浪拍孤堞。柔櫓悲聲頻發，驪歌恨曲
未闕。念一寸回腸，千縷結。柳條去，忍使攀折。但悵惘章
臺路，多少相思，撓愁絕。悽切去程浩渺，空濶奈斷梗
孤蓬。西風外，簌簌殘吹咽，應暗為行人傷念離別。淚波
易竭，凝怨懷羞覩當時明月。烟浪無窮，青山疊魚封。

遠鴈書漸歇甚時合金釵分處缺漫飄蕩海角天涯再
見日應憐兩鬢玲瓏雪

前調

次周美成韻

楊澤民

禁城外青青細柳翠拂高堞征鼓催人驟發長亭漸覺
宴闌情緒似丁香百千結忍重看手簡親折聽怨舉離
歌寄深意新聲更清絕 心切暮天塞草烟濶正乍裛
輕塵新晴後汨汨清渭咽聞西度陽關風致全別玉杯
屢竭思故人千里惟同明月 扶上雕鞍還三疊那更

第四聲未歇念蟾魄能圓還解缺況人事莫苦悲傷悴
豔色歸來復見頭應雪

前調

李尚書
山園

吳文英

夢仙到吹笙路杳度巘雲滑溪谷冰綃未裂金鋪晝鎖
乍掣見竹靜梅深春海濶有新燕畫簾低說念漢履無
聲跨鯨遠年年謝橋月 曲折畫闌盡日憑熱半蜃起
玲瓏樓閣畔縹緲鴻去絕飛絮颺東風天外歌闌睡紅
醉纈還是催寒食看花時節 花下蒼苔盛羅韞銀燭

短漏壺易竭料池柳不攀春送別倩玉兔別搗秋香更
醉蹋千山冷翠飛晴雪

前調

次周美
成韻

陳允平

暮烟愁鴉歸古樹鴈過空堞南浦牙樯乍發陽關歌盡
半闕早恨入回腸千萬結長亭柳寸寸攀折望日下長
安近莫遣鱗鴻成間絕悽切去帆浪遠江濶悵頓解
連環西牕下對燭頻哽咽嘆百歲光陰幾度離別翠銷
粉竭信乍圓易散絲雲明月浙水吳山重重疊流蘇

帳楚臺夢歇暗塵鎖孤鸞秦鏡缺羞人問怕說相思正
蒲院楊花落盡東風雪

西平樂

又一體雙調一百三
十五字或加慢字

西平樂

重過西湖
先賢堂

吳文英

岸壓郵亭路歌華表堤樹舊色依依紅索新晴翠陰寒
食天涯倦客重歸嘆綠草平烟帶苑幽渚塵香蕩晚當
時燕子無言對立斜暉追念吟風賞月十載事夢惹綠

楊絲 畫船為市天妝艷
日落雲沉人換春移誰更
與苔根澆石菊井招魂
漫省連車載酒立馬臨花
猶認 薦紅傍路枝歌斷
讌闌榮華露草冷落山丘
到此徘徊 細雨西城羊
曇醉後花飛

歌頭

本教坊曲取以名詞
雙調一百三十六字

歌頭

後唐莊宗

賞芳春暖風飄箔鶯啼綠
樹輕烟籠晚閣杏桃紅開繁

萼靈和殿禁柳千行斜金絲絡夏雲多奇峰如削紈扇
動微涼輕綃薄梅雨霽火雲爍臨水檻永日逃繁暑泛
觥酌露華濃冷高梧凋萬葉一霎晚風蟬聲新雨歇
暗惜此光陰如流水東籬菊殘時歎蕭索繁陰積歲時
暮景難留不覺朱顏失却好容光旦旦須呼賓友西園
長宵讌雲謠歌皓齒且行樂

西平樂

又一體雙調一
百三十七字

西平樂

復遊天
長感賦

周邦彥

稚柳蘇晴故溪渴雨川迴未覺春賒
駝褐寒侵正憐初日輕陰抵死須遮
歎事逐孤鴻去盡身與塘蒲共晚爭
知向此征途區區竚立塵沙追念朱
顏翠髮曾到處故地使人嗟
道連三楚天低四野喬木依前臨路
歌斜重慕想東陵晦迹彭澤歸來左
右琴書自樂松菊相依何況風流鬢
未華多謝故人親馳鄭驛時倒融尊
勸此淹留共過芳時翻令倦客思家

前調

次周成
美韻

方千里

倦蹋征塵厭驅匹馬凝望故國猶賒孤館今宵亂山何
許平林漠漠煙遮悵過眼光陰似瞬回首歡娛異昔流
年迅景他鄉霜楓敗葉驚沙無奈輕離易別千里意制
淚獨長嗟綺牕人遠青門信杳釵影何時重見雲斜
空怨憶吹簫韻曲旋錦迴文想像宮商蠹損機杼生塵
誰為新妝暈素華那信自憐悠颺夢蝶浮沒書鱗縱有
心情盡為相思爭如傍早歸家

前調

次周美成韻

陳允平

泛梗飄萍入山登陸迢遞霧迴烟賒漠漠蒹葭依依楊
柳天涯總是愁遮歎寂寞塵埃滿眼夢逐孤雲縹緲春
潮帶雨鷗迎遠瀝鴈別平沙寒食梨花素約腸斷處對
景暗傷嗟曉鐘烟寺晨鷄月店征裾蕭疎破帽歌斜
憶幾度微吟馬上長嘯舟中慣蹋新豐巷陌舊酒猶香
憔悴東風自鬢華重憶少年櫻桃漸熟松粉初黃短楫
歡呼日日江南烟邨八九人家

多麗


又一體雙調一百三十八字

多麗

李漳

好人人去來欲見無因記當時竊香倚煖豈期蜨散鷦
分到而今漫勞夢想嗟後會慘啼痕繡閣銀屏知他何
處一重山盡一重雲暮天杳梗蹤萍跡還是寄孤邨寂
寥月今宵為誰虛照黃昏細追思深誠密意黯然一
晌消魂仗遊魚漫傳尺素望塞鴈空憶回紋帳冷衾寒

香消塵滿博山沉水更誰熏斷腸也無聊情味惟是殢
芳尊沉吟久移燈向壁掩上重門



御選歷代詩餘卷九十八

欽定四庫全書

集部

御選歷代詩餘卷

九十九
一百

詳校官中書

臣潘有為

侍讀

臣孫球覆勘

總校官進士

臣

朱鈐

校對官編修

臣

沈清藻

謄錄監生

臣

崔鶴立

欽定四庫全書

御選歷代詩餘卷九十九目錄

起一百三十九字至一百四十六字

多麗

又一體

晁補之

晁端禮

二首

王安中

張綱

張元幹

楊无咎

葛立方

張孝祥

嚴仁

歐良

李清照

詹正

張翥
三首

前調又一體

葛立方

周格非

六醜

周邦彥

方千里

楊澤民

陳允平

前調又一體

吳文英

詹正

多麗又一體

王肯堂

六州歌頭

程秘

輪臺子又一體

柳永

十二時 又一體

葛長庚

六州歌頭 又一體

韓元吉

夜半樂

柳永

六州歌頭 又一體

李冠

前調 又一體

辛棄疾

張孝祥

劉克莊

張翥

前調 又一體

劉過

前調又一體

袁去華

夜半樂 又一體

柳永

小諾皋

王世貞

御選歷代詩餘卷九十九目錄

欽定四庫全書

御選歷代詩餘卷九十九

起一百三十九字至一百四十六字

司經局洗馬掌局事兼翰林院修撰加二級臣王奕清奉

旨校刊

多麗

又一體雙調一百三十九字

多麗

觀輕盈彈琵琶

晁補之

新秋近晉公別館開筵喜清時銜杯樂聖未饒綠野堂

邊繡屏深麗人乍出座中雷雨起鷗絃花暖間闕冰凝
幽咽寶釵搖動墜金鈿未彈了昭君遺怨四座已淒然
西風裏香街駐馬嬉笑微傳 算從來司空見慣斷腸
初對雲鬟夜將闌井梧下葉砌蛩收響悄林蟬賴得多
愁潯陽司馬當時不在綺筵前競歎賞檀槽倚困沉醉
倒觥船芳春調紅英翠萼重變新妍

前調

晁端禮

錦堂深獸爐一噴沉煙紫檀槽金泥花面美人斜抱當

筵掛羅綾素肌瑩玉近鸞翅雲鬢梳蟬玉筍輕攏魚紋
細抹鳳凰飛出四條絃碎牙板煩襟消盡秋氣滿庭軒
今宵月依稀向人欲鬪嬋娟變新聲能翻往事眼前
風景依然路漫漫漢妃出塞夜悄悄商婦移船上愁
思江邊怨感分明都向曲中傳困無力勸人金盞須要
倒垂蓮揠沉沉醉身世恍然一夢遊仙

前調

晁端禮

晚霞收澹天一片琉璃爛銀盤來從海底皓色千里澄

輝瑩無塵素娥澹泞靜可數丹桂參差玉露初零金風
未凜一年無似此佳時向坐久疎星時度烏鵲正南飛
瑤臺冷闌干凭暖欲下遲遲念佳人音塵隔後對此
應解相思最關情漏聲正永暗斷腸花影潛移料得來
宵清光未減陰晴天氣又爭知共凝戀如今別後還是
隔年期人總健清尊素月長願相隨

前調

大名岳宮作

王安中

魏都雄鳳凰飛觀雲間佩麟符荀池元老暫辭西省仙

班憇甘棠地澄遠籟詠華黍河卷驚瀾碧草淒迷丹毫
冷落園扉鈴索鎮長閒繡筵展三台星近鏘玉韻珊珊
金尊灑新醅方薦薄暑初殘政成時歡餘客散後園
朱戶休闌度秋風畫欄枕水掛夜月雕檻騎山錦帳籠
香鸞釵按曲琵琶數轉語綿蠻勸行榜眉間黃氣先報
袞衣還登庸際應褒舊德喜動天顏

前調

張綱

愛家山坐來心與雲間念生平功名有志暮年多病知

難眷簪纓未容引去奈猿鶴久已催還松菊關情蓴鱸
引興昔人高韻照塵寰細追想山林鍾鼎從古罕兼全
歸來好皇恩賜可拂袖欣然望西清猶叨法從夢魂
寧隔台躔時七松便爲小隱開三徑且樂餘年賓友相
過雞豚爲具從容聊作飲中仙君試聽陽春佳闕今日
怡新傳休辭酒從教醉舞踏碎花氈

前調

張元幹

少年時壯懷誰與重論視文章真成小技要知吾道稱

尊奏公車治安祕計樂油幕談笑從軍百鎰黃金一雙
白壁坐看同輩上青雲事大謬轉頭流落徒步出修門
三十載黃梁未熟滄海揚塵念向來浩歌獨往故園
松菊猶存送飛鴻五絃寓目望爽氣西山忘言整頓乾
坤廓清宇宙男兒此志會須伸更有幾渭川垂釣投老
策竒勛天難問何妨袖手且作閒人

前調

中秋

楊无咎

晚風清澹雲捲盡輕羅看銀蟾初離海上碧溪萬里澄

波碾雲衢玉輪緩駕照山影寶鏡新磨光徹庭除寒生
綺席無聊清興助吟哦共宴賞明宵天氣晴晦又知他
無眠處夜濡湛露目斷明河念年來青雲失志舉頭
羞見姮娥且高歌細敲檀板擗痛飲頻倒金荷斷約他
年重揮大手桂枝須斫最高柯恁時節清光比似今夕
更應多功名事到頭須在休用忙呵

前調 賞梅

葛立方

冷雲收小園一段瑤芳乍春來未回窮臘幾枝開犯嚴

霜傍黃昏暗香浮動照清淺疎影低昂却月幽姿含章
媚態姮娥姑射下仙鄉倚闌看殷勤持酒索笑也何妨
堪憐處東君不管獨自淒涼算何人為伊銷斷古今
才子篇章有西湖賦詩處士與東閣年少臺郎驛使來
時吳王醉處幾番牽動廣平腸賸宴賞微酸如豆又是
隔年長高樓外莫教羌管吹墮寒香

前調

張孝祥

景蕭疎楚江那更高秋遠連天茫茫都是敗蘆枯蓼汀

洲認炊煙幾家蝸舍映夕照一簇漁舟去國雖遙寧親
漸近數峰青處是吾州便乘取波平風靜荃棹且夷猶
關情有冥冥去鴈拍拍輕鷗忽追思當年往事惹起
無限羈愁挂笏朝來多爽氣秉燭夜永足清遊翠袖香
寒朱絃韻悄無情江水只東流舵樓晚清商哀怨還聽
隔船謳無言久餘霞散綺煙際帆收

前調

嚴仁

最無端官樓畫角輕吹一聲來深閨深處把人好夢驚

回許多愁儘教儂受此箇事未必君知淚滴蘭衾寒生
珠幌翠雲撩亂枕頻敲牕兒上幾條殘月斜玉界羅幃
更堪聽霜摧敗葉靜扣朱扉念別離千里萬里問何
日是歸期關情處魚來鴈往斷腸是免走烏飛美景良
辰賞心樂事風流孤負縷金衣漫贏得花顏玉骨瘦損
爲相思歸須早劉郎雙鬢莫遣成絲

前調

楊花

歐良

日初長寶猊一縷沉煙綠陰新垂楊亭榭知誰巧擘香

絲有時共落紅零亂有時共芳草留連只道無情那知
有意幾回飛徧綺窓前人爭訝豔陽三月乾雪舞晴天
游絲外不堪燕掠無奈蜂黏那小鬟忒煞嬌劣漫鎮
日倚闌干輕吹處櫻桃的的閒拈處玉筍纖纖愛點猩
羅裝成蠻纈嗔人不許放珠簾端相好驀然風起特送
上秋千明朝看池塘雨過萍翠應添

前調

蘭菊

宋媛

李清照

小樓寒夜長簾幙低垂恨蕭蕭無情風雨夜來揉損瓊

肌也不似貴妃醉臉也不似孫壽低眉韓令偷香徐娘
傅粉莫將比擬未新奇細看取屈平陶令風韻正相宜
微風起清芬醞藉不減荼蘼 漸秋闌雪清玉瘦向人
無限依依似愁凝漢皋解珮似淚洒紈扇題詩明月清
風濃煙暗雨天教憔悴瘦芳姿縱愛惜不知從此留得
幾多時人情好何須更憶澤畔東籬

前調

詹正

晚雲歸小樓又做新涼霎兒間恨桐招雨西風葉葉商

量醒時心又還南浦愁邊句多在斜陽菱枕籠清蓮瓶
拖豔旋傾花水燕茶香怨蛩有許多言語說動軟心腸
夜沉沉幾條涼月界破晴牕共繡簾吹絮未久却孤
劍水雲鄉自家書未能成字鄰家笛且莫吹商好夢偏
慳閒情未了隔牆又唱謝秋娘
綈綈依舊時香摺戲封
做書囊鴛鴦字見時千萬繡一雙雙

前調

爲友人
書所見

張翥

小庭堦簾櫳婀娜蓬萊恨匆匆歸鴻度影東風搖蕩情

懷不多時見他行過霎時後依舊回來銀鈿雙鬟玉絲
頭導一尖生色合歡鞦韆香粉繡茸衫子窄窄可身裁
偶回頭笑渦透臉蟬影籠釵憶踈狂隨車信馬那知
淪落天涯豈寇初可憐春早菖蒲晚難見花開紅葉波
深綵樓天遠浪憑青鳥信音乖等閒是這番迷眼無處
可安排行雲斷夢魂不到恐賦陽臺

前調

清明上巳同日
會飲樂壽園

張翥

鳳凰簫新聲遠度蘭橈漾東風湖光十里參差綠港紅

橋暖雲蘸鬱金衫色晴煙抹翡翠裙腰罨畫名園鬧紅
芳樹蒲葵亭畔絲繩搖蒲鴛鴦落英堪藉猶作帶人嬌
漬羅袂莫揉痕退生怕香銷憶當年尊前扇底多情
冶葉倡條浴蘭女隔花偷盼脩禊客臨水相招舊約尋
歡新聲換譜三生夢裏可憐宵縱留得棟花寒在啼鴉
已無聊江南恨越王臺下幾度迴潮

前調

西湖泛舟
席上作

張翥

晚山青一川雲樹冥冥正參差煙凝紫翠斜陽畫出南

屏館娃歸吳臺遊鹿銅仙去漢苑飛螢懷古情多憑高
望極且將尊酒慰飄零自湖上愛梅仙遠鶴夢幾時醒
空留得六橋疎柳孤嶼危亭待蘇堤歌姬散盡更須
攜妓西泠藕花深雨涼翡翠菰蒲軟風弄蜻蜓澄碧生
秋鬧紅駐景採菱新唱最堪聽見一片水天無際漁火
兩三星多情月爲人留照未過前汀

前調

又一體
七夕遊蓮蕩作

葛立方

破波光如鏡雙翼輕舟對雨餘重巘疊嶂何妨影墮清

流望芙蓉渺然如海張雲錦掩映汀洲出水奇姿凌波
豔態眼看一葉弄新秋恍疑是金沙池內玉井認峰頭
花深處田田葉底魚戲龜遊 正微涼西風初度一彎
斜月如鉤想天津鵲橋將駕看寶匳蛛網初抽曬腹何
堪穿鍼無緒不如溪上少淹留競笑語追尋惟有沉醉
可忘憂憑清唱一聲檀板驚起沙鷗

前調

周格非

隴頭泉未到隴下輕分一聲聲淒涼鳴咽豈堪側耳重

聞細思量那時攜手盡樓高簾幕黃昏月不長圓雲多
輕散天應偏妒有情人自別後小牕幽院無處不消魂
羅衣上殘妝未減猶帶啼痕自一從瓶沉簪折要知
欲見無因也渾疑事如春夢又只恐人是朝雲破鏡分
來朱絃斷後不堪獨自對芳尊試與問多才誰更匹配
得文君須知道東陽瘦損不爲傷春

六醜

雙調一百四十字明楊慎易
名箇儂或分爲兩調者非也

六醜

薔薇謝
後作

周邦彥

正單衣試酒悵客裏光陰虛擲願春暫留春歸如過翼
一去無迹爲問花何在夜來風雨葬楚宮傾國釵鈿墮
處遺香澤亂點桃蹊輕翻柳陌多情更誰追惜但蜂媒
蝶使時叩牕隔東園岑寂漸蒙籠暗碧靜遶珍叢底
成歎息長條故惹行客似牽衣待語別情無極殘英小
強簪巾幘終不似一朵釵頭顫裊向人歌側漂流處莫
趁潮汐恐斷鴻尚有相思字何由見得

前調

次周美成韻

方千里

看流鶯度柳似急響金梭飛擲護巢占泥翩翩飛燕翼
昨夢前迹暗數歡娛處豔花幽草縱冶遊南國芳心蕩
漾如波澤繫馬青門停車紫陌年華轉頭堪惜奈離襟
別袂容易疎隔 人間春寂漫雲容暮碧遠水沉雙鯉
無信息天涯漸老羈客歎良宵漏斷獨眠愁極吳霜皎
半侵華幘誰復省十載勻香暈粉髻傾鬟側相思意不
離潮汐想舊家按酒巡歌計今難再得

前調

次周美成韻

楊澤民

歎濃歡易散便忍把恩情拋擲恁時寸心惟思生翅翼
別後踪跡不定如萍泛暫拋江沔又流連京國芳容料
見尤光澤共賞清樓同遊綺陌皆曾痛憐深惜縱鱗鴻
託意雲水猶隔 蘭房深寂映輕紅淡碧翠竹名花底
同燕息杯盤屢肯留客見真誠厚愛意深情極烏紗翦
爲新冠幘誰知道荏苒塵埃帶祿任他傾側朝雲信且
候潮汐但素心未改伊人在應須近得

前調

次周美成韻

陳允平

自清明過了漸柳底鶯梭慵擲萬紅御風飄飄如附翼
錦繡陳迹障地香塵暗飛蜂似雨漫冶遊南國蘭襟縹
緲辭湘澤馬跡郊原燕泥巷陌傷春爲花深惜歎芳菲
薄倖容易踈隔庭閒人寂空餘芳草碧夢裏驚春去
如瞬息長安市上狂客爲桃源解珮醉濃歡極無心整
霧襟煙幘驚回處斷雨殘雲倦倚畫闌干側相思恨暗
度流沙更杜鵑院落黃昏近誰禁受得

前調

又一體
夕風雨

元

吳文英

漸新鵝映柳茂苑鎖東風初掣館娃舊遊羅襦香未滅
玉夜花節記向留連處看街臨晚放小簾低揭星河湫
豔春雲熟笑靨歌梅仙衣舞纈澄澄素娥宮闕醉西樓
十二銅漏催徹紅銷翠歇歎霜簪練髮過眼年光舊
情盡別泥深厭聽啼鴉恨愁霏潤沁陌頭塵韞青鸞香
鈿車音絕却因甚不把歡期付與少年花月殘梅瘦飛
趁風雪丙夜求更說長安夢燈花正結

前調 楊花

詹正

似東風老大那復有當時風氣有情不定江山身是寄
浩蕩何世但憶臨官道暫來不住便出門千里癡心指
望迴風墜扇底相逢釵頭微綴他家萬條千縷解遮亭
障驛不隔江水 仄洲曾樣等行人歲歲日下長秋城
烏夜起帳廬好在春睡共飛歸湖上草青無地惜惜雨
春心如膩欲待化豐樂樓前帳飲青門都廢何人念流
落無際幾點搏作雪絲髮潤爲君裛淚

多麗

又一體雙調
一百四十字

多麗

王肯堂

步花陰蒲園春色飄零過橫塘曲闌斜折崎嶇轉入水
亭坐無聊起看畫障行還倦閒撥爐熏暗覺聲喧微窺
影亂映門一線露羅裙雙扉啓縞衣翠袖相簇度銀屏
霎時間虛牕雪豔素壁霞明細看他蓮隨步起果然
蘭並肌芬臉盈盈疑開蛤帳腰細細堪試香塵膩髮盤

雲脩眉偃月珊瑚一顆感朱櫻擎漿處春纖如削渾是
玉雕成臨別去流波迴覩障面笑狂生

六州歌頭

雙調一百四十一字六州伊涼甘石氏
渭也唐時樂府多以此名填詞因之

六州歌頭

程秘

向來抵掌未必總談空難徧舉質三事試從公記當年
賦得一丘一壑天鷲濶淵魚靜莫擊磬但酌酒儘從容
一水西來他日會從公曳杖其中問前回歸去笑白髮

成蓬不識如今幾西風
蒙莊多事論豕推羊蟻未
辭終又驟說魚得計孰能通歎如雲網罟龍伯啖眇難
窮凡三惑誰使我釋然融豈是匏瓜繫者把行藏悉付
鴻濛且從頭檢校想見喜迎公湖上千松

輪臺子

又一體雙調一
百四十一字

輪臺子

柳永

霧斂澄江煙鎖藍光碧
彤霞襯遙天掩映斷續半空殘

壁孤邨望處人寂寞聞釣叟甚處一聲羌笛九疑山畔
纔雨過斑竹作血痕添色感行客翻思故鄉恨因循阻
隔路久沉消息 正老松古栢青如織聞野猿啼愁聽
得見釣舟初出芙蓉渡頭鴛鴦灘側干名利祿終無益
念歲歲間阻迢迢紫陌翠娥嬌豔從別經今花開柳圻
傷魂魄怕利名牽役又怎忍把光景拋擲

十二時

又一體三疊一
百四十一字

十二時

葛長庚

素馨花生枝無幾秋入闌干十二那茉莉如今已矣只
有蘭英菊蕊霜蟬年時香橙天氣總是悲秋意問宋玉
當日如何對此淒涼風月怎生存濟還未知幽人心
事望得眼穿心碎青鳥不來彩鸞何處雲鎖三山翠是
碧霄有路要歸歸又無計奈何他水長天遠身又何
曾生翅手撚芙蓉耳聽鴻鴈怕有丹書至縱人間富貴
一歲復一歲此心終日繞香盤在篆畦兒裏

六州歌頭

又一體雙調一百四十二字

六州歌頭

韓元吉

東風著意先上小桃枝紅粉膩嬌如醉倚朱扉記年時
隱映新妝面臨水岼春將半雲日暖斜陽轉夾城西草
軟沙平驟馬垂楊渡玉勒爭嘶認蛾眉凝笑臉薄拂
脂繡戶曾窺恨依依昔攜手處香如霧紅隨步怨春
遲消瘦損憑誰問只花知淚空垂舊日堂前燕和煙雨

又雙飛人自老春長好夢佳期前度劉郎幾許風流地
也應悲但茫茫暮靄目斷武陵溪往事難追

夜半樂

三疊一百

四十三字

夜半樂

柳永

凍雲黯澹天氣扁舟一葉乘興離江渚渡萬壑千巘越
溪深處怒濤漸息樵風乍起更聞商旅相呼片帆高舉
泛畫鷁翩翩過南浦望中酒旆閃閃一簇煙邨數行

霜樹殘日下漁人鳴榔歸去敗荷零落衰楊掩映岝邊
兩兩三三浣紗遊女避行客含羞笑相語到此因念
繡閣輕拋浪萍難駐後約叮嚀竟何據慘離懷空恨歲
晚歸期阻凝淚眼杳杳神京路斷鴻聲遠長天暮

六州歌頭

又一體一百四十三字或作三疊或
分四段今按張孝祥詞止雙調仍之

六州歌頭

驪山

李冠

淒涼繡嶺宮殿倚山阿明皇帝曾遊地鎖煙蘿鬱嵯峨

憶昔真妃子豔傾國方姝麗朝復暮嬪嬙妒寵偏頗三尺玉泉新浴蓮羞吐紅浸秋波聽花奴敲羯鼓酣奏鳴鼉體不勝羅舞婆娑正霓裳曳驚烽燧千萬騎擁瑤戈情宛轉魂空亂感雙蛾奈兵何痛惜三春暮委妖麗馬嵬坡平寇亂回宸輦忍重過香塵紫囊猶有鴻都客鈿合應訛使行人到此千古只傷歌事往愁多

前調

又一體

辛棄疾

晨來問疾有鶴止庭隅吾語汝只三事大愁余病難扶

手種青松樹礙梅塢妨花逕纔數尺如人立却須鋤秋
水堂前曲沼明於鏡可燭眉鬚被山頭急雨畊壟灌泥
塗誰使吾廬映污渠歎青山好簷外竹遮欲盡有還
無刪竹去我乍可食無魚愛扶疎又欲爲山計千百慮
累吾軀凡病此吾過矣子奚如口不能言臆對雖廬扁
藥石難除有要言妙道往問北山愚庶有瘳乎

前調

張孝祥

長淮望斷闕塞莽然平征塵暗霜風勁悄邊聲黯銷凝

追想當年事殆天數非人力洙泗上絃歌地亦羶腥隔
水羶鄉落日牛羊下區脫縱橫看名王宵獵騎火一川
明笳鼓悲鳴遣人驚念腰間箭匣中劍空埃蠹竟何
成時易失心徒壯歲將零渺神京干羽方懷遠靜烽燧
且休兵冠蓋使紛馳驚若爲情聞道中原遺老常南望
翠葆霓旌使行人到此忠憤氣填膺有淚如傾

前調

牡丹

劉克莊

維摩病起兀坐等枯株清晨裏誰來問是文殊遣名姝

奪盡羣芳色浴纔出醒初解千萬態嬌無力困相扶絕
代佳人不入金張室却訪吾廬對茶鐺禪榻笑殺此翁
癯瑤砌金壺始消渠憶承平日繁華事修成譜寫成
圖竒絕甚歐公記蔡公書古來無一自京華隔問姚魏
竟何如多應是綵雲散劫灰餘野鹿銜將花去休回首
河洛丘墟漫傷春弔古夢遶漢唐都歌罷歛歛

前調

孤山
尋梅

張翥

孤山歲晚石老樹查牙逋仙去誰爲主自疎花破冰芽

烏帽騎驢處近修竹侵荒蘚知幾度跼殘雪趁晴霞空
谷佳人獨耐朝寒峭翠袖籠紗甚江南江北相憶夢魂
賒水遶雲遮思無涯又苔枝上香痕沁么鳳語凍蜂
銜瀛嶼月偏來照影橫斜瘦爭些好約尋芳客問前度
那人家重呼酒摘瓊朶插鬢鴉喚起春郊扶醉休辜負
錦瑟年華怕流芳不待回首易風沙吹斷城笳

前調

又一體

劉過

鎮長淮一都會古揚州昇平日珠簾十里春風小紅樓

誰知艱難去邊塵暗戎馬擾笙歌散衣冠渡使人愁屈
指細思血戰成何事萬戶封侯但瓊花無恙開落幾經
秋故壘荒丘似含羞 悵望金陵宅丹陽郡山不斷綢
繆興亡夢榮枯淚水東流甚時休野竈炊煙裏依然是
宿貌貅歎燈火今蕭索尚淹留莫上醉翁亭看濛濛雨
楊柳絲柔笑書生無用富貴拙身謀騎鶴來遊

前調

又一體
淵明祠

袁去華

柴桑高隱丘壑歲寒姿北牕下羲皇上古人期俗人疑

東帶真難事賦歸去吾廬好斜川路攜筇杖看雲飛六
翮冥冥高舉青霄外矰繳何施且流行坎止人世任相
違采菊東籬正悠然見南山處無窮景與心會有誰
知琴中趣杯中物醉中詩可忘饑一笑騎鯨去向千載
賞音稀嗟倦翼瞻遺像是吾師門外空餘衰柳搖踈翠
斜日輝輝遣行人到此感歎不勝悲物是人非

夜半樂

又一體三疊一
百四十五字

夜半樂

柳永

艷陽天氣煙細風暖芳草郊外閒凝佇漸妝點亭臺參
差佳樹舞腰困力垂楊綠映淺桃穠李夭夭嫩紅無數
度綺燕流鶯鬪雙語翠娥南陌簇簇躡影紅陰緩移
嬌步擡粉面韶容花光相妒絳綃袖舉雲鬢風顫半遮
檀口含羞背人偷顧競鬪草金釵爭笑賭對此佳景
頓覺銷凝惹成愁緒念解珮輕盈在何處忍良時辜負
少年等閒度空望極回首斜陽暮歎浪萍風梗如何去

小諾皋

雙調一百四十六字明王世貞自度曲按諾皋太陰之名唐段成式著諾皋記又有支諾皋調名取此

小諾皋

王世貞

闔闢以前乾坤之外到了不堪窮際儘追求儘多胡突
依形附氣何處小兒謔語羞殺井蛙蛭蟻說甚麼出世
住世治世黃面瞿曇青牛老子更有那我家司寇伎倆
一般而已賺人處還在此 稷下萬言河間千卷畢竟

沒些把鼻莫輕容古人瞞過常談俗事裝點幾張故紙
無奈藏頭露尾不睬他上計中計下計濁酒三杯清琴
一几別饒借澹月微風受用殘山剩水五更事休辦取

御選歷代詩餘卷九十九